

主編 黃靈庚 陶誠華

上海古籍出版社

金華宗譜文獻集成
9

主編 黃靈庚 陶誠華

上海古籍出版社

金華宗譜文獻集成
9

目錄

金華宗譜文獻集成（東陽宗譜四） 東陽市委宣傳部編

單國爐輯

王

東陽河汾王氏宗譜

一

湖滄王氏宗譜

一〇三

東陽畫溪王氏宗譜

一四九

吳

東陽高城吳氏宗譜

三七一

東陽南岑吳氏宗譜

三八三

王

東陽河汾王氏宗譜

王氏家乘序一

叙曰譜者普也普載祖宗遠近姓名諱字又云譜者布也敷布遠近百代之綱紀萬代之宗源序述姓名謂之譜系條錄婚姻宦謂之籍狀天子書之謂之紀諸侯書之謂之史大夫書之謂之傳總而言之謂之譜譜者補也有遺亡者治而補之故曰序得姓之根源記世數之遠近父昭子穆百代在於目前鄭元云譜之於家若網在綱綱張百目譜定萬支今恐一枝之上榮枯有異則強弱相陵一祖以後貴賤不同則尊卑相混故舉大綱以明衆目所以四海各流乃東非西是以木有凋榮之幹羽有長短之毛或敗袍輕裘共出公卿之派佩玉負薪不廢連枝之葉詩云獨行踽踽豈無他人不如我同姓父祖既同不比他人之姓則是百裔同歸一祖千葉同生一株不譜而德色諄語之風聞良可慨嘆王氏居東陽之雙溪者唐吏部尚書曰宏爲始祖迨今幾一十三世兵火相罹譜牒幾於燬燼得其宗支於斷簡而編次之後人曰愈攜來徵文考其先世有文獻可徵若卧雲齋曰奕以性理之學濂洛之傳其詩詞精拔人物高雅芳聲美譽風被後世生於今者可不黽勉德業惇行孝友以同樹宗風以力支門第使仁讓之教孝友之誼郁然薰蒸於家庭達於里巷以表著於當世也

哉王氏子孫尚宜讀書制行益厲誠其終焉可也中有訛誤今不可考實祐戊午八月初吉迪功郎鎮江府金壇縣丞馮文中序此卧雲公塋不叙姻戚可疑

麗川王氏宗譜原序六

王氏出太原唐中和間吏部尚書公宏自括蒼來居於合浦五遷至麗川六遷至金盤二十八代七百五十餘年土著久發祥遠蓋故家遺族也歷有家譜自明萬曆甲辰至今缺如中間相去八十餘載王氏宗長乃鳩族衆而謀輯修之譜成問序於予予曰子作譜爲作套譜乎抑欲作傳譜乎如作套譜則序世系排行列作傳贊銘志以潤色之如是而已若欲爲傳譜不惟其文惟其人且不惟登巍科躋顯秩文章彪炳功名煥赫之人而爲希天之人欲爲希天之人則必爲達天之學千古有斯學則千古不爲虛劫天下有斯學則天下不爲虛宇一國一鄉有斯學則一國一鄉不爲虛壤斯學散之則彌六合攝之則在方寸洪範傳云思曰睿睿作聖人至睿聖而極而一思可通又何難乎然聖以思通以無思合不學不慮之良此人心之天千聖之根柢也人能默而體之一念相應時時提撕綿綿若存一切倫常事物無適而非天理之流行則盍以一德爲始祖以太虛爲始祖所自出以兩端爲昭穆以五常爲伯仲叔季之分支以念念相續爲瓜瓞之綿連如是在一邑則一邑之志譜之在一郡則一郡之志譜之在一朝則一朝之史譜之在地則譜之爲五嶽在天則譜之爲列星予所云傳譜者如是吾閱王氏之譜其先有卧雲先生者曾作知復反本觀過由義等詩殆宋儒之知道者今復有天資卓犖矯然立

志者向予而請業焉故予因序譜而與之論學不然不且笑予嚙語乎大清康熙壬寅九月既望眷弟魏麓趙忠濟岐寧父拜撰

永康巖渡復合譜序七

巖渡始祖泰四十六府君諱世葵乃崇十七府君諱伋之子伋字聲甫徐伯範曾爲作解嘲詩跋乃卧雲公子朝瑞之子則巖渡爲卧雲公嫡派考之徐伯範訓蒙集跋可據也況巽三六公譜序又云卧雲公集永康宗子燬於火則巖渡爲卧雲公後嗣然無疑然考之系圖又多參錯良以卧雲公後麗川無人圖傳不無訛誤今亦不敢擅改巖渡始祖世葵府君遷於元今十三世幾四百年矣明宣德朝麗川巽三六府君修譜尚合其後則自爲行或同或異不一不通譜者三百年於此矣今作譜又合澤出於河復入於河同源共本雖鄉縣遙隔歲月悠久分而復合若或使之世葵府君以贅壻遷巖渡其時以拱把樟木二一植合浦寺山門一植其宅旁合浦寺樟木予及見之大可隱牛以其中空鬻而伐之今巖渡樟木偉然鬱葱足表故家蓋不忘麗川分根云聞吾族明時與長衢郭姓爭合浦寺中岡巖渡有人背負黃袱至按院衙門叫屈乃准其辭山卒歸寺與有力焉其不忘祖宗發祥之地如此按巽三六公譜叙卧雲公詩文合刻燬於巖渡今巖渡以巽三六公刻譜文集至中有尚書公御賜詩同僚和章道十五公慈溪祈雨紳士頌德詩併序及巽三六公存思亭記麗川佳趣詩序徐伯範先生跋合十餘篇皆一家文獻所係麗川譜皆遺而巖渡寶藏之今悉補入其有功於先人甚大巖渡有節婦二予皆表之於序又有序狀等文譜師之作事實語陋皆酌而存之大清雍

正十年歲次壬子三月上巳二十六世孫八十叟崇炳撰

河汾王氏續修宗譜序八

東陽麗川王氏出於太原今稱河汾蓋追慕文中子之爲人而溯其所自云始祖唐吏部尚書宏首建厥家自唐迄宋代有科目而官不顯此後書香相繼宋時有卧雲先生者與陳龍川唐悅齋遊其文章風旨則粹然儒者也明時有巽三六府君居喪廬墓作存思亭於墓側喜爲詩文好賢禮士唱和之作積成卷軸詩書一脉如火相傳將燼復燃今則有鶴潭先生竊嘗自浙至京遍交朝賢無足當意大河以北則有李恕谷大江以南則有王先生故先人行狀出之恕谷而墓志則必得先生之文恕谷與先生皆出蕭山毛西河先生之門然恕谷之學尚經濟先生之學在性命其趣操不同要其卓然高蹈成一家之學則一也先生工制舉業試文爲天下傳誦生平瓣香蓋在先正然性恬淡不樂仕進強仕外即不應闡試既出貢廣文一席屆期不赴冢嗣德載予鄉榜同年友一試南宮即懸公車考縣職吏部檄取謁選以親老侍養辭古人一日侍養三公不換何有乎百里之宰而先生之教又以退步爲進步者宜其於功名之際如此昔建陽蔡氏三世積學不仕至其孫抗驪躋台鼎泰山之雲十日不散則必有霖雨普注十圍之松長於幽谷則必爲棟梁之用其不遇匠石精液凝結則爲琥珀凡物蓄之不深積之不久則發之必不光文中子之學不顯於其身則在其子孫王氏子弟才俊聯翩乘風鵬起可立而待然對管幼安邴根矩說人間富貴事良可愧矣王氏續修宗譜屬予爲序平日受教既深無容以不斐辭謹序其簡端如此時雍正

十年歲在壬子三月上已賜進士戶部山東司郎中年姪永康程開業頓首拜撰

河汾王氏重修宗譜序九

源之遠者流必長根之深者葉必茂黃河之水源出崑崙紆迴浩漫不知其幾千里也故由龍門流駛以達海而莫窮其所止極泰山之松根盤地脈不知其幾百仞也故其本廣數十圍支幹拂雲而蔽日顧水木之有本源由子孫之有宗祖也東陽鐵霞王老先生攜其重修家譜問序於予予按其世系始祖唐吏部尚書公宏由括蒼徙居東陽迄今千有餘年歷三十餘世派別支分煥焉昌熾夫天下故家舊族多矣求如王姓之宗歷久寢繁至遠益彰者未數數觀竊欲求其所以致此之由而不可得及靜讀其先世祖卧雲公遺稿上虞令諱偉慶宗源流諱柱春野堂詩存思亭記太老先生鶴潭公家訓并諸記誌與詩文集而知其學則先性命而後舉業風則貴樸實而賤浮華士則樂恬退而耻倖進農則務耕耘而戒游惰行則重節孝而薄囂凌文則習渾成而去雕鏤居則緣溪巖而遠城市乃恍然曰王氏之宗系久而寢繁遠而益彰者其以此乎夫乃嘆文繡與布帛比雖無不謂文繡美不知文繡之華而易敗實不如布帛之質而常完也予交當世知名士久矣如鶴潭太老先生振婺州之絕學而紹其傳於何王金許四先生後誠本朝一代偉儒故當時如顏學山汪荇洲毛西河方樸齋杭堇浦鄭南谿郭開遠諸乎齋齊次風諸名宿靡不悉心折服而乃蕭然泉石不樂仕進默窺其志惟願以其學淑郡邑之士與其後裔令不汨沒於詞章膚淺之習有以繼先哲而昭來

許又其長君霽堂先生登賢書辭謁選一日養不以三公換今其季鐵霞先生秉鐸江邑崇樸黜浮絕奔競請謁之途遇諸生奮志上達者雖窮窘落拓必激厲之得所作詩文之佳者動流播傳誦足爲江邑士指南然率爾天真襟期懷葛猶紹先世宗風也嗚呼當世華胄顯裔一時炫門楣耀宗支不數傳而流遺寥落如槿榮於枝望暮而萎雨盈於澮立時而涸所在皆然王氏則卧雲諸公崛起於前鶴潭諸公繼武於後其所以綿族裕後之道心心相印猶水之源既遠而遞潛之使益遠則其流之長孰得而測之木之根既深而愈沃之使益深則其華之茂孰從而量之予自都南歸偶應須江院長之請與鐵霞老先生盤桓數載最爲忘形交因不辭鄙陋謹序其簡端如此時乾隆三十三年歲次戊子秋七月穀旦賜進士第欽授翰林院編修華田顧震如霆氏拜手書

河汾王氏重修家譜序

婺東王氏之郡係河汾者於嘉慶九年甲子亦既旅悉其姓之肇自周著自漢望自隋遷自唐及居之析自宋元明龍敦史別簡以渲其風之淳俗云朴學之魁傑於儒林事藏械授予讀之予維王氏之系屬河汾里在二十四宗蓋別於太原鄉鄉諸郡也久矣按昌黎稱王氏皆王者之後爾言太子晉得非以論徵叩角嚳嚳樂部維師曠臆年之不登歟孺仲膺聘煌煌耀耀仲危動其妻告曰敗業是擁何慚兒子遂辭玄是其夫婦皆著有隱德於焉啓後寧國恪箸泊學溝河汾著錄者凡三千人或以爲議經近借則束廣微補詩白少保補書劉元父補大小戴記獨不疑爲僭何也故子程子昌爲大儒超唐軼

漢而俗乃謂隋唐書皆不列其人疑爲亡是公子讀宋端明唐書明附以傳特河汾開譜年十五年二十有三蓋隋人也當列隋書爾當列唐書耳唐之開國其輯內攘外將相咸自得力其在王姓卓惟大啓厥後麟炳六王互當裴總管予取而勃闡易矢孝絕殊凡謫比僖宗昨唐王氏祖有諱宏者嘗列官吏部尚書兼兵部尚書年未屆引去僖宗嘉其恬退寵以詩諸同官之張東門者曰沈賁曰馮安曰王太曰周淮曰孫鑒曰潘誠屬而和之遂自括帥筵簞廣東陽合浦尚書以噌吰韞輅隱啗九耳曰此梵唄來也遂捨宅裝迦葉阿難頌夾濠雙溪嗣是而芟蕪薄橋頭礮掾輦柩窆隨德藻復捨去慨惠伽藍遂乃魁東川之漕桀麗川之漕或播緇州或掉禹航廬玉山龍回其綴姓則仍於東陽江河處曰麗川金盤蓋代有人焉合慈溪者民戴其德格璘而捍儀號卧雲者人服其教磨鉛而握槧字喜野者據罔極之思懇柱廬之結雖詩敦義動濮陽許孜誠孚賁鹿誠無能過而鶴潭先生之心學克紹七傳於文成者俄掀然起矣夫天下之所藉以幹乾旋坤而衷諸道人也人之所藉以通微幹顯而覈諸聖心也鄉試與閱譜中所輯非必殫見而洽問非必操觚而按卷亦非必躬英敏之姿抱岐嶷之質但問譜所縷生卒必大書國號者其君臣之義乎知君臣之義則可忠於巔末必大書曰某公之子子某子某者其父子之倫乎知父子之倫則可孝於男女必大書曰娶某氏嫁某氏者其夫婦之別乎知夫婦之別則可節於所自出必大書曰某公長子某公次子某公幼子者其兄弟之分乎知兄弟之分則可恭可友乃復繫之乎狀誌銘表徇之乎序記贊頌崇其克忠克孝能節能義能恭能友者以示之檢正天地之性原體用之一得家國之合經

於以振綱史於以獲紀學問文章於以得所宗而審所祖亦各取諸心之所同然而理爾外是矣蓋以心感心不知愚別以心因心不絲毫異但藉心以體道則道明根心以荷道則道立未可遽云即心即道耳今王氏篤淳龐而室機奔厥風茂焉葆精神而紇僭侈厥俗敦焉影風而肄雅範法而規度厥教興焉此所由稱發東巨族而以心任道固不諂方卑視乎儋一爵而昂昂得一第而倖倖者乃董是譜者復攤芳前哲爲重誥後來可謂砥不已之心而廣諸代衍日繁之俗矣予忝世交而申之以婚姻通之以饋問容少一言爲是譜弁歟故本其事爲序時嘉慶九年歲次甲子夏五月穀旦己酉科拔貢候選儒學教諭前庚子南巡召試眷弟蓬萊樓上層頓首拜撰

河汾王氏重修宗譜序

唯皇上御極之三十四年我國人仰荷天恩預備立憲聯結團體組織羣情化自私自利之心爲公益公德之舉方將合四萬萬人而同胞目之矧其爲一本耶然而人以多而渙誼以疏而睽亦勢之無可如何者於此而欲渙者萃睽者比非譜牒不爲功程子曰欲天下厚風俗親宗族使之不忘乎本莫如明譜學然則譜牒之修實爲朝廷治平之基礎而前世姓氏志傳等於史氏石室之藏良有以也河汾王氏吾東之望也與寒宗世講秦晉邇益瓜葛連蔓珩高祖母誥贈宜人王欽旌節孝奉旨建坊槐嵐公之長女也而內子則王氏所自出也晉封夫人金係益三公之女幼育於外家兼以心香一瓣屢謁龍門珩受養於敦職諱朝俊老夫子門下知之悉以深矣溯自尚書公適開厥緒載啓孫

謀相繼取科第登仕版者接踵位雖不大顯要皆無忝厥職若文瑞伯達泰美諸公官邑宰有政聲而道學一派直接四先生之緒尤爲八婺光鶴潭公文行兼優崇祀名賢故其子孫多能重禮教崇信義士食舊德之名氏農服先疇之畝畝商循族世之所鬻工用高曾之規矩絜乎隱隱各得其所庶人在官者無有也質庫漁利者無有也其敦龐淳樸惟余知之惟余能言之不待徵譜系而推世德矣歲孟冬諸君子以所次世緒郵函以告曰敢乞一言之弁而余竊有感於天下國家之際焉古者平章之化基自親睦而睦族之道必先修譜以聯之是以有小史以奠繫世有族師以書其孝弟睦婣有學者惟宗族之序明夫然後相保相愛咸期於德行道藝之歸倘亦整齊家法施於有政之意乎夫天下之俗固非一家所能變然易稱一正家而國定使有家者咸克明其譜牒儼然有恩以相待燦然有禮以相接毋挾富而輟其貧毋先疏而後其親庶幾可以收族人之心即可以收天下人之心道在擴而充之焉耳由是赴乎公益之程度達乎公德之目的仰副聖天子聯結團體之睿慮觀斯譜也余觀其後矣至其世代傳承之次諸縉紳先生名篇鉅筆記載備詳茲不復贅云時龍飛光緒三十四年歲次戊申孟冬上浣之吉賜進士出身誥授通奉大夫賞戴花翎二品銜補授湖北荆宜兵備道前外務部郎中署理丞參白浦後裔吳品珩拜撰

宋迪功郎卧雲王公行狀

公王姓諱奕字宗甫上世由括蒼來居唐乾明年間始祖諱宏爲吏部尚書後漢乾祐初四世祖章任浦江縣丞六世祖爽與七世祖堯

卿遷居於東川至公之曾大父孝議大父公選宋中進士爲慈溪縣令父天錫世積厚德公生於乾道戊子十二月庚寅器識恢宏儀矩灑落事親孝居家理鬢齡即知力學稍長束書從悅齋唐先生著作陳公龍川先生文毅公游爲文援筆輒就脫稿率爲人膾炙二先生深器之且稱其年小文老浩博典麗公益自策厲居則曰人家元氣在詩書闢室東偏扁曰漱芳上礫書閣揭以中庸大學論孟格言日處其中涵詠省察亦每自得其館名師舍益友歲無虛席於義方尤篤繡川楊公焯金華徐公三傑皆隆禮延致俾子姪執經肄業焉晨窗夜檠時督課程非但以口率而身化之也公記誦琅琅遇得意處即時手錄雖老勿倦如春秋左傳要旨治鑑篤論等書率門編戶列鉅成鉅帙雖天文地理律歷圖志亦皆訂證其該洽類如此暇頃拂襟袖縱論古今得失斗酒篇詩惟意之適往往不事雕組每寓愛君憂國意殆類詩史因書其稿目爲卧雲集晚歲婆娑泉石蒔花峙木幅巾靜憩山間四時盡在目擊胸中一坵一壑澹如也孔山文惠喬公嘗廣其撫孤松詩勉以未合投閑之句時憲使節香馮公特卿餉使裕齋馬公光祖亦叙其卧雲集且述公平生大略令藏之家塾嗚呼以公之才學得於師賢推於鄉評皆以遠大期公奈何命之不偶惜哉公力量堅凝遇事不懾或震撼捷出則靜應如冰底浪每以禮遜待鄰曲月正元日必會拜近寺序少長尊高劭導和銷戾莫不德公茲舉鄉間久困於役公則首捐膏腴倡率之至今無以病役告者公之設施若此已有可觀矣晚遇宋朝慶需授初品官漕衛公檄上華亭鎮端平丙申十二月戊子終享年六旬有九娶蔣氏前公十五年沒子男二人長朋瑞後公四年歿次行可爲伯父仲彬後亦早

世一女適迪功郎鎮江府金壇縣丞馮文中節香公之季子也孫男三人長彌明次彌堅命繼行可幼彌高皆肄舉子業孫女一人適進士郎蔣淡曾孫男二人名棠卿棟卿女三人尚幼公無恙時卜兆祖塋之左去家百步而近孔山表其墓曰王氏南山之阡今翰墨猶炳炳也諸孫將以淳祐壬子十一月丙申奉柩以先事彌明來訪俾狀公之言行埏於公爲同郡而次子肄太學庭藻且爲人甥壻既忝姻好尤悉公履歷誼不獲辭謹此次梗概以俟立言君子謹狀淳祐十二年十月望日眷甥迪功郎江陰軍司理參軍劉埏狀

高大父鶴泉府君狀

府君諱埏字子靜別號鶴泉自高曾以來代有厚德府君秉性通敏倜儻有遠志處宗族鄉黨溫溫柔靜至其見義敢爲則確乎不可拔也吾族自南宋以來世居麗川十二代而至府君慨然有別建厥家之意遂於故明嘉靖庚申遷於金盤居焉金盤去麗川不三四里以其當鶴洲之北故曰後田其初平疇曠野荆棘之所生府君周步環觀或登高以望見夫二溪合流東西迴抱前後左右諸峰莫不合形輔勢效美呈秀列峙而相向其間原隰相錯獨後田一區寬平高大圓美不缺有類金盤遂定宅於此而以金盤名稱後田仍舊號也然而接連巨族往往惡其逼處里中少年每迭出其計以相干犯府君亦迭有以應之其小小者則不計也蓋府君新宅於此寸田皆其故土不爲介意厚結其族之年高有德望者曲爲周旋卒成輯睦其處家庭克盡孝友之道自考妣以上三代皆未卜葬塋兆皆公所成其教子孫必以詩書禮義弗納於邪其於地理雖所精究然根極儒術

不爲迂怪無稽之談其所卜塚宅類皆周密完好無巖石峻嶒風水穿激之患使觀者暢然有以得諸心目之間初未嘗私獨好以求異永康京尹程居左公文章品行馳聲東南嘗以百金聘府君一時名貴爭欲禮而致之然公亦不樂往每一指點便如影響食其德者至今或戶祝之所著地理纂要一冊以爲人子固宜知之然弗業於是苟欲得吉土以安先靈必以誠敬求之若巧營僞處則地靈不發蓋其氣象光明存心忠厚類如此始公之遷金盆也所居不過容膝漸次開廣堂廳廂廊俱備衢道門閭皆高大開敞令可容車馬曰吾子孫必有顯者嗚呼府君單身創業兢兢不敢懷安不敢畏難而決幾以斷又能含容濡忍不以一日之忿而悞遠大之計故能筆家茲土使子孫得以蒙業而安府君生於正德己巳正月十六日戌時卒於萬曆壬午六月初十日亥時享年七十有四葬於本鄉橫嶺下南澗之原公之所自卜娶同鄉厲氏溫淑有婦道經營家業不辭勞瘁公遷居內助之力居多子男六長繼沛次繼清博士子次繼京次繼善次繼方次繼恩炳等愚不肖不能顯揚萬一以副宗祖之望聊述其梗概藏之家乘且將乞文作者以徵信焉時康熙丙午十月既望元孫崇炳盥手謹狀

觀所王君傳同三十一序生

君諱繼瀾字尚本號觀所幼稟慧質既冠補博士弟子每試輒先時髦以數奇迺修德就閒事親務養志處同氣以和庭闈雍睦臨財廉與人信鄉鄰或是非相構君正色立剖居鄉恒恂恂遇事則揮霍有餘一室齋居問業者屢滿戶外莫不虛往實歸所至諸縉紳士夫爭

致君惟恐不至娶張氏先君而卒伯子曰夢箕侍疾居喪都克盡禮即少連不遜也自是伯子獨當戶一切家政咸倚辦伯子伯子拮据攻苦爲諸弟先諸弟或請息伯子愀然曰丈夫起家多得精勤縱自愛奈何貽大人憂故觀所翁得優游肆意於吟壇酒社賓朋往來之間觀所翁疾伯子侍奉不怠割股進之疾遂瘳顧觀所翁不但有子乃其女者亦非常人也女諱青適同邑張願學早寡甘節如飴稱未亡人論者悉推本君之家教楊子曰吾鄉多譽髦其質行往往著聞乃若王君觀所其爲人直而正灑然而通渾厚樸直若嬰兒未孩閭廓深沉若涉海不可爲量慎始令終名實純粹其苗裔亦弈世載德蔚有令聞昔仲尼之徒孝稱閔氏詩三百篇烈惟柏舟君以一門兼之不大難乎故君雖白首牖下後必有大其門者傳曰不於其身於其子孫吾於王君亦云時萬曆甲寅七月既望賜進士第通議大夫北京府尹眷生居左程正誼頓首拜撰

臨五十六序華公傳

府君姓王諱良榮字序華行五十六貌魁偉豐厚咄咄不妄言語而幹才內蘊曾無先人舊資之藉飄泊無有定處於是挈家於邑之玉山居焉玉山當東陽萬山之中魚鹽往來果蔬之所出而山商海賈之所聚也府君於是相其要衝而僦舍居焉貯物轉貨逐時貿易不數年而家已給矣於是使其二子就學塾師曰吾家世讀書不可當吾身而失之爾時運逢澤火草澤之奸青袍白馬乘隙而起聚烏合之衆持白梃而殺人而玉山遂爲綠林巢窟府君攜其二子傾側擾攘於戎馬間凡茲數年積聚又蕩然無有存者然而府君志不自挫

因利乘便與爲廢舉暇則仍督責其二子讀書使無廢學曾不幾時而大兵所過蜂屯蟻聚之衆掃除一盡而鄉邑肅清於是府君慨然有懷土還鄉之志遂挈眷而歸歸則買田築室日以恢擴嗚呼今之原田晦晦者昔之貧無立錫者也今之華屋鱗鱗者前之風日不蔽者也人固不可以貧賤喪志如府君者又寧可預量耶先是府君落魄時自謂吾雖窮窘二子當不落後今其兩郎皆出人頭地而次公在庠序尤藉甚有聲後來之秀且在諸孫詩書之報應未有盡而府君者髦年神旺豐融悅澤髯髮皓然不攜杖而健步時或幅巾布袍視童僕而課耕桑里中少年之貧不自棄而冀得有造於後者皆援府君以爲言府君性淳樸未嘗道人過惡亦未嘗幸人之災而樂人之禍其於親戚雖數代如一日也庶幾盛德長者固宜昌其後云時康熙丁卯春上浣之吉賜進士第文林郎知廣東大浦縣事辛酉廣東同考奉旨行取候補科道通家眷侍生宋嗣京頓首拜撰

臨五十府君緝之公傳

公諱良瑞庠諱國楨字輯之夙秉通敏機警有才不修邊幅文不雕飾而洞中肯綮鶴巖王公中昇器重之與其子承武爲束髮交承武少年負才每試必偕去則駕一舟攜觴載酒放意山水不以得喪爲念長衢富人圖合浦寺山營葬訟經數年不決時出而對理者爲子祖乾八十府君諱元紀每庭鞠長衢諸生數十輩羅公廳衆口一詞以公弱冠當之聲朗氣壯論者皆沮寺遂得全鼎革以後絕筆不復爲舉子業而豪氣時露其於人倫獨真嘗言戊子之亂伯祖母卧病人皆挾衣裝器皿倉皇出走而公獨從容負母而行賊且逼矣不懼

也然卒無恙公晚年好浮屠氏修齋誦經歲時伏臘與鄉之老人迎神賽禱或遇除道成梁之事而豪氣益奮因自別其號曰難老翁焉公所爲文多不存稿獨見其登禹山一篇記得梵音斷續來天上月下逢僧對奕棋之句云姪崇炳謹撰

杜仲芳先生贈詩一首

幡然七十五年人見道終身不厭貧寂寞同僧閒說法往來訪友共尋春生憎薄習還求舊更喜忘機覺易親今日桃源隨杖履何如黃綺避風塵

序華公臨五十六府君行傳

隱君姓王氏諱良榮字序華而行則臨五十六也爲人襟期慷慨丰度雅飭平生出一言無不可質諸神行一事無不可對人語不義之財必較錙銖不善之累有如探湯屋漏衾影克慎克戒倘所謂仰不愧而俯不作者乎若夫五常六行本乎天性事上接下一秉謙和涉世而不偏好惡居鄉而不修邊幅與人處如春溫之可掬故人無不傾心而願與之交歡者詩有云豈弟君子殆其人與而隱君尤善操家政事自戊子遭亂室廬灰燼產耗家涼迨乎一廬復業數載承平家業用昌雖族里有向稱素封者無多讓焉配南門吳氏婉婉柔和黽勉敬戒舉案如賓琴瑟靜好今雖飄然仙逝而屈指春秋已七十有九矣與隱君之七十有五者正不啻雙壽齊眉也尚何憾歟然隱君今且鶴算呈祥貌古神旺乃謝去一切世務山水逍遙烟霞寄傲令人可仰而不可即其地上行仙哉舉二丈夫子長崇福字斌甫

綜理家務克勤克儉次世鳳字文瑞課以一經泮宮高列一女適長衢郭厥孫三曰國梁曰國楠曰國楚或則岐嶷俊朗或則彬彬文學咸駸駸乎未有量也倘所云庭階玉樹華萼相輝者與噫若隱君者宜其望重鄉閭齒頰芬芳也余聞而敬之因悉書其大概焉賜進士及第奉直大夫右春坊右諭德兼翰林院侍講庚戌科分校禮闈纂修孝經前翰林院修撰通家侍教生繆彤頓首拜撰

伯父谷馨公行狀 臨百十六

伯父諱良蘭字秀芝別號谷馨秉性通敏高雅拔俗遇事輒應胸無停機援筆作文漓澌灝瀚若注水於河而不能盡也作詩不喜古法率意高吟自然清酒圍棋彈琴不學而工走筆作行草天矯飛動常自得意其所畫梅竹蘭菊小草奇石隨意點綴自有生趣戊子己丑之際山寇倣擾鄉邑鎮帥坐勦民皆逃避伯父教以撫綏之術籌議多所補益事親能盡色養之道兄弟友愛未嘗有疾容遽色視兄弟之子真猶己子憶昔兒時頗慧伯父抱置膝上教以吟詩屬對每一對出輒撫掌稱快或賓朋宴會必出以誇之甫就小學諄諄督課旦暮以冀有成易簀之際惓惓以書香不繼爲慮嗚呼伯父之卒至今已二十八年墓門白楊且堪作柱而炳兄弟樗散猶昔風雨一燈音容如昨迴念屬望之意能不爲之悵然伯父生於萬曆癸丑正月初九日丁卯戌時卒於順治辛丑十月廿九日乙亥亥時配厲氏伯父初寢於試伯母鳴機夜織拔釵以佐故得以卒業詩書炳筆墨蕪陋而名不出於鄉邑不能識天下賢士求文以彰隱德家譜將成行跡不可無紀承伯兄指示錄其梗概於此伯父遺草不下數百餘篇皆

制科之文例難入譜詩亡殆盡存者百之一耳時康熙丙寅冬十月既望姪崇炳盥手謹狀

王隱君旭野傳 臨一百二十五

王旭野先世自括蒼來居吳寧之東曰金盤幼業儒讀書曉大義爲人重然諾明取與嶄然自立不喜扳援聲勢凡事直言無忌諱評是非枉直一以公鄉里推爲邨原陳實營祖墓構公宅以身先之不辭勞瘁族有寡而無嗣者志在守貞而苦無資給口食之田俾全其節一人孤且貧自詛速死翁憐之撥門首腴田令耕種勿課其租死而無主者不論遠近親疎給以棺衾自爲營葬行之四十年不倦是殆直己而行者乎抑所謂好行其德者非耶翁性明敏凡星相卜筮之書多所涉獵明地理精尅擇堪輿言數十家叩之應答如響使其耽精經史圖籍其淵博通達摘文敷藻必洋洋灑灑迥出羣彥而惜乎不竟所學也然信心而行其德與古訓脗合今之咕嗶稱文士者諂媚權勢行曲而謀詐口是而心實違之取不顧義見人有緩急不肯捐一介相贈其不逮翁遠甚嗟乎世之貌爲儒而非儒者多矣若翁者其名非儒名也其行則儒行也惟其然是以終食儒之報今長子曰崇煜文行爲儒林推重三子崇炳穎悟絕倫文藝超卓童試時寸晷中縱筆作十五藝皆殊絕也遂奪幟先登餽於庠每試輒冠軍尤篤志理學余不敏承先師蘋齋陳子提命竊先賢唾餘冀延道學一線炳時赴會有以佐其不逮德造高深殊未可量聞翁先世初卜居時自識曰此地二水交流山秀澤媚後必有顯達之士光大吾門以二子卜之吾知其必驗於翁家無疑也予故言之以爲後日之券翁

名良芳字茂之別號曰旭野配厲氏溫恭簡靜事姑盡禮相夫子以德娣姒之間怡怡無間言其於鄰里乞假毫無吝色尤能哀憐孤寡延師課子中饋克盡其敬子四人孫男七人一門兄弟妯娌藹如春融識者占爲百福之萃云時康熙丙寅冬月既望巍麓眷弟趙忠濟頓首拜撰

王彬如公傳 臨一百四十九

翁諱良文字彬如質厚其別號也曾祖諱挺祖諱繼方父諱元祺尚書公二十五世孫也翁小孜孜力學明癸未一試進庠時齡二十一儀容秀皎如玉方閉戶讀書而時當鼎革山寇擾亂幾十五載戊子寇大猖獗焚屋殺人公挈眷遠避烏傷奉養二親慇懃懇懇己丑賊退閭里少息旋歸七月災疫流行椿堂染疾翁憂甚星夜跋涉請醫煎奉湯藥不解帶者一月親疾瘳冬母又病調治盡力不可救藥居喪哀戚粗蔬飭粥以盡治喪之道越丙申寇又蟻聚焚掠鄉村翁挈家避難長衢親戚家鎮兵蜂屯宅舍翁接禮誠篤彼亦施敬都有棍徒潛伏營中生事造端以圖財賄翁言請主帥即趕逐地方以安後辛丑歲文廟告傾羣議修葺知友吳廷數等至舍議買良材翁曰羣材既朽一動搖則蠱壞不支異時復欲易材所費滋大且既葺之後人心渙而難聚以求永逸難矣不如重建數翁合意稱善遂創議建暨斯時諸友雲集公家尋覓梁棟大木翁真誠款禮毫無懈意曰建聖宮美舉也給價必須優足墳宅蔭木不可強也更捐資助建孜孜勞勩師友稱聖宮主人時徽商納稅行鹽有人係翁舊交爲商鬻鹽於其地以索私鹽害人以翁言而止翁爲人格謹仁厚爲人謀而忠

約期必信見義必爲臨財不苟勿畏強禦勿侮貧弱晚歲博極羣書玩河洛好淵明清遠之節少游止足之風或散步林邱玩景怡情或與知己笑飲伸杯談古明道恬然也嘗曰年既高德亦當與爲俱高武公耄耄之箴不可忘身體受之父母曾子淵冰之戒當永念命子孫志超者勤讀以隆禮義質鈍者疾耕以充倉廩所著有河洛正解太極辯論陰陽真要藏於家時康熙丁卯秋月同學弟趙珪頓首拜撰

兄爾文傳 咸十二公

爾文兄諱崇典公平樂善不苟取少孤貧以藝自資長而有家田廬頗給宗族往來慶弔有吉凶同患之意好舉公事吾伯叔兄弟春秋祭饗得以聚族於公庭之下而當日庀材度木皆兄所指畫故至今猶追悼之兄有從婦寡而再醮娶者饋以金受而藏之謂其人曰勿動既嫁使其子袖以往其人見且驚心疑其求益曰尊翁不應有他曰弗也家君無所用此特相還耳一時皆高其義同里之族兄曰某者一子病痘幾死力無所得藥醫者曰得參尚可活兄買參與之今其子能負薪矣嘗欲有以報之其爲人如此難矣弟崇炳撰

自述

予二十即治詩禮春秋三經易書則手抄記其精語三傳史記老莊唐宋八家皆誦服於時文外時亦作詩於選詩三唐兩宋元明本朝名家無不周覽於古人詩評鍾嚴以下無所不觀今爲詩未必工然無浮艷無怨悱無感激無抑鬱不諛貴不自張心平氣和時寓勸懲

黃山谷論陳后山詩都非無爲而作予嘗存此意焉予向不作詞以其賡酒頌色不足以翼風雅七十以後得金澹歸集其詞皆發揮道趣心竊喜之興之所到時亦爲之雖不足於華艷庶可爲砥世勵俗之一助云予作古文無所因襲神機天放不妨自成一家予少即有志理學讀四子書於大全或問反覆十回盡透本旨然不過分晰條理提綱挈領而不能與吾心打成一片繼而歷覽宋元明諸儒語錄其於明道陽明尤所心契然亦未到渙然冰釋之地後觀指月錄者十年一切公案莫不窮參實証一旦豁然有得於拈花之旨乃知一千數百則公案只是少林一案更無別案後觀四書五經若紅爐上一點雪又如大海之納衆流一切礙膺之物俱消歸於無有昔明道先生見濂溪後遊心於釋老者十年歸而求諸六經其理咸具乃知未學釋老於經尚未圓也予二十六歲方進學時援納例開入學每縣四名且皆以賄得予急於一衿作十五藝以第一名入泮年三十一等第二名補廩年六十五出貢中間領批者五一等第二者三二等第一者三鄉試凡五次闈卷皆略點數行小戰勝大戰不勝都不足道誌譜以示子孫不嫌於樸故一及之吾居鄉不謁官長貴者不趨乞丐不慢視一族如一家視異姓如同姓一以寬洪謙退處之故生平並無微嫌吾教弟子不論束修有無悉皆勤心教誨故多所成就即未執贄以文就正者莫不攻瑕摘瑜以是得進學者甚多吾爲麗正書院師受業五十人不數年或進學或補廩或登第方予辭館歸諸弟子送郭外或至墮淚予今年八十八邑弟子欲製錦屏祝壽不約而同予堅却之而諸弟子之情可見矣然可與談道者絕少予待師長即蒙師亦不忽置少壯之交白首不忘或募金同人以養

師母營師墓至京取友客觀嘗思人生交友如作戲下場當歡喜團聚必不可戴甲操戈非但朋友親戚亦然予少年無雜好文史餘暇則博習陰陽時日星歷占卜而於陰陽選擇尤精蓋風俗與時移易自管郭著書陰陽之法捷如影響呂才之論有不足以盡格天下者朱文公考妣分葬相去百里且素改葬當其母喪時東萊致書以爲不必拘陰陽之法人之不相知如此予曾學醫康熙戊戌瘟疫大作時醫束手予取傷寒大成究之用劉河間李東垣法治傷寒用吳又可法治疫集爲傷寒條貫篇國陸用之所活甚多予書驗矣予爲人如此後世必有病吾學之雜者不知人之秉性不同稽康之鍛謝元之蠟屐嗜之不厭陸象山有棋癖朱紫陽好風水不失爲儒者與其藏頭匿尾以逃世議不如將此心托出在千萬人面前較顯白也余所著有四書口談學樞堂詩稿學樞堂文集學樞堂詩餘金華文略蘭溪唐思正梓此現藏學樞堂金華徵獻略東藕塘金孔時藏地理贅言選擇舉要陽宅條貫篇傷寒條貫篇娶湖溪張氏生於順治丁酉二月廿九壬寅日巳時卒於康熙庚寅閏七月初九日子時葬三十九都油麻塢進龍山之原婦湖溪張氏也名閭娘家本寒素少知倫紀年十八歸於我事翁嫜最謹盡色養之道先大人稱之曰賢繼事先妣一味之甘必先進之每有呼必舍所事趨而執役母年高多忘每事婦謹記以待咨問縫紉烹割之外若驅蚊拾蚤捫虱之役皆有常課先母每就浴俟浴竟即攜利器視足之胠甲而剪剔之以爲常先母彌留之日於人世一無所戀而重捨予婦外父病歸而侍養大小之便皆手承之外父憐之垂歿曰汝事我良苦死而有知吾必乞賢子與汝外父卒丈母在堂迎而奉養併以一女一子來丈母終幼弟與

妹各有歸而長兄忽喪其明迎而養之終於予家婦自奉極菲予時遊學在外生蔬一束和脫粟食之予歸或進甘鮮婦精勤善畜瓶盎之貯必留其羨不至急而有求又未嘗失歡鄰曲先大人臨終子婦皆侍諄諄以兄弟姊妹和睦爲囑歿後或記或忘不一婦時時稱述遺命欷歔欲淚婦素健不謂一病遂不起自嘆文字鄙拙不足增伉儷之重要爲不妄言者諸子有志顯揚他日徵文作者予之所述即左券矣

王君恭卿傳 咸四十六公

爲生民於天地間有三道焉具之者庶幾俯仰不忤曰正曰孝曰成家吾於恭卿王君聞之本家耆說實具三道者焉自童子時器稱優異不失剛方五十餘年巔末無耗可爲正道具矣天性純孝日無忘親時凡遇適口適情之物必攜之奉親冀生喜快親有疾必謹侍無間盡心調治痊安而後他適年十八時父疾殊艱君忘寢食爲經持藥食數嘗而進使涼熱不過父疾益艱君深夜焚香告天願移身年爲父益壽及濱危君默挾刀呼天冀垂憐惻剜股肉以達至情創幾斷筋悶絕經時方甦既調羹進父食畢未移時覺胸次疏暢神情泰然誠孝道格天之驗也疾由是瘳益年幾紀昆季凡七人方異爨時君年甫弱冠未聞資業遺授惟奮智能兼勤苦以經厥緒日滋月益僅三十年間積累可數千金立巨厦廣膏腴男女室家親朋濟接成家之道於斯爲盛矣王氏茲編家乘率有述載君男棟子請爲乃父紀其行不屬文華而屬野拙者蓋取拙實無僞得乃父之真具述如上更喜棟子足紹父具有其道年方二紀卓立端步昔侍父疾憂勤

交至不異君之侍父衣不解帶者凡數月及父捐館哀慟過情其後薦祭豐殷副父宿志曾不以財貨爲惜今者治家立身均有常度去就取舍明洞秋毫其真保家承業之賢嗣也君於出世法中更多殊行非家乘所當載概略不錄

附金氏孺人小傳

金氏孺人女字四娘婦道無愆經家多智夙興夜寐不虛寸陰孜孜成業爲心儉治口體居常惡食是飽布服是溫紈素精珍並非所嗜王君成巨業實金補助功多子棟念之不忘囑令專筆妾黃氏名春姥捐身侍疾割股輸誠矢志守節嘗遭旁撼多端兀不可動專誠鞠撫長孫懋熹所望以視老夫亦君之正孝所感致焉時康熙二十六年季夏靈溪方外友振濟述

王君岐山傳

咸六十庠生

君諱崇貴庠名世鳳字文瑞岐山其別號聰穎內蘊局量寬裕無淺迫急躁之氣時方弱冠運值鼎革新市平林之屬橫於鄉邑朝奔夕竄殆無寧日每出必挾書以逃但得即次即默誦暗記既而歸甲曾無一椽以蔽風雨而暫處市宅爰從從叔谷馨先生遊援筆作文即取諸平日所服習恢恢有餘凡試輒以蜚弧先登庠序中咸以千里駒目之而挫於決科此蓋有天非戰之罪生平事親從兄不失大體靜默未嘗談人過每有事不爲權首而處衆人之後故尤悔不及所居之處必闢室數間清閒雅潔游心書冊竹裏題詩花間酌酒而尤癖於棋當其勝負相持十呼而一唯十唯而一起起而徘徊躊躇必

竟此局或且至再不已似無意家計者然乃從容吟嘯而家計日豐嗚呼國家之事或早起晏罷倉皇竭蹶而不足或優游坐鎮而有餘其得失亦若是而已夫失於當局而圖於事後失者一朝數十年救敝扶衰不暇身徒勞而事益無濟故君子貴乎握幾而扼要也觀王君理家通於國矣然君素灑落不吝賑乏里有貧人將鬻妻捐金周之使夫婦完好夫有小德小得報有大德大得報多蓄財而無德以居之莊生所謂爲他人守財也德及於人而其報身自受之不然則在其子孫所謂出諸內府藏諸外府也今聞君之子曰國梁端楷無俗韻風氣日上即高其門都未可知如此子弟非有德者不能有之嗚呼苟使圖書有托而得優游肆意於圍棋詩酒之間如王君者亦已足矣又何求哉時康熙丁卯歲花朝之吉賜進士及第奉直大夫右春坊右諭德兼翰林院侍講庚戌科分校禮闈纂修孝經前翰林院修撰通家侍生繆彤頓首拜撰

先兄終朗府君行述

咸九十府君

先兄諱崇煜字繼照晚年自號終朗蓋取高朗令終之義寒宗王氏系出太原世居東陽孝順鄉之金盤爲儒族先兄少從伯父谷馨先生學伯父卒先兄恐書香不續督課甚勤每歲偕崇炳負笈從師相攜出試康熙丙辰時閩寇未平大軍屯金華學使者於蘭溪駐節試士其年先兄進學年至六十以得頭眩症遂不試先兄少與武巖虞彥方善彥方稔知靈素之學灸法甚精先兄從學焉先兄之學不如彥方然彥方灸十而愈六先兄灸十而愈八先兄爲人灸視女與男等視穢與淨等視貧與富等視野菜淡飯與盛饌等凡少年婦人卸

衣解纏手爲按摸點穴灼艾如一家子女無一毫顧忌意其或疲聾殘疾癰身爛足臭穢不可近亦手爲按摸點穴灼艾無一毫厭惡意每歲就灸者不絕於門至六月間男婦駢填如市莫不以次輪治不受一錢即酌以禮物亦必却之或病不能來有請必赴即年將八十皆扶筇而往山居草野欸待疎略或不能飽腹而反不但不出諸言而併不少介於心先兄取穴悉皆古法然亦時有出入莫不應手即愈內經云人有吉手有凶手豈先兄其吉手乎蓋先兄之灸術可學也而其所以處灸之道不可學也先兄善治圃歲栽菊數十本比及花期鄰里環乞皆分予之種韭韭極肥乞亦不吝憶從先兄應試蘭溪主人居三層樓予兄弟寓最上一層而路從房門循梯上主人妻白皙澹粧予見其端麗無甚冶態居數日先兄乃挈予移寓城外越三十年予至蘭溪問主人姓名唐中舍存素笑曰先生何以問彼此娼家也他日過其門則彼婦蒼然老妓矣乃追嘆先兄之謹厚但不知先兄知其娼而避之與予不知其爲娼而安之孰愈先兄於一切時文皆市其善本而甲乙之所喜則手錄而加裝釘焉計前後所錄文不下二十本檢其中無一遺落訛誤及挖補字論者以爲福徵云先兄爲人樸直無機處鄉曲是曰是非曰非所是雖貧且懦必是之所非雖強有力必面非之故弱有所恃以立而強者有所懾而不敢動於惡其初不免招尤久之莫不心服一時鄉黨是非必取憑於先兄先兄中年病眩暈仍愈素康健一日爲人灸俯而灼艾畢忽不能伸腰乃扶臥於床安寢七日卒享年八十有一可謂高朗令終矣遠近之人莫不羨先兄之享有多福無疾而終而深惜其亡疾病者無所恃以生不勝其咨嗟嘆悼云三弟崇炳識

王鶴潭先生行述 咸一百六十五

先生諱崇炳字虎文號鶴潭少以孝友著年弱冠以十五藝冠童子軍歲科每試輒第一文名籍籍州郡間爲人尚潛修敦實行懼婺州理學之浸漸也朝惕夕乾鰓鰓焉以爲己任父歿茹素三載未嘗見齒居母喪亦如之弟子居憂多有傲而行之者先生遭喪除讀禮外即期功之服亦時面有戚容宴飲不樂此皆本於天性無假勉強初受業趙濟卿先生後濟卿先生卒於館計至先生方痘於股距館八十里即扶病奔喪隨柩旋里畢葬而後歸又受業趙齊卿先生齊卿先生沒聞喪則夜往畢喪後見師母已頌白舉一子幼家甚貧先生泫然流涕糾前後同學諸友曰我等忍令師母坐斃乎因倡率募貲得數十金置一家以每歲出息爲師母膳後師子長遂以所募金爲娶婦嗣克以延窗友李梧岡詩名重海內卒於京邸亦爲倡捐募貲載柩歸里蓋尊師重友皆人之大節所在而先生視屬本分事也年四十外即棄舉子業爲性命之學專心著述六旬外出貢郡守張遜庵坦讓聘爲麗正書院師不旬月諸弟子心悅誠服不異程門雪立時也比臘解館歸弟子環送途次多有淚濕沾襟者初遜庵丁外艱欲循例居任守制先生正色直言歷引古人以曉之遜庵勃然不悅諸弟子曰太守怒矣先生休答曰吾爲院長禮當言之豈戀區區遇合輒忍默乎後數年遜庵改調吉安寄書先生曰吾守金華所負愧於先生者二事一以郡志久蕪不獲乞椽筆修之後誰克當此任者一以身罹大故蒙先生正言不悟遺嗤後人吾閱人多矣如先生者所僅覩也東藕塘金孔時通郡之善士也踵廬延至東湖講學紳士

繹絡赴就每日數十餘人聞教皆恍若發蒙銘佩勿忘先生年八十餘猶能爲繩頭細楷手不停筆目不停卷歲乙卯除夜示諸孫侄曰計吾今一歲所作古文五十餘首時文六十餘首詩餘三十餘首詩一百七十餘首此吾八十三歲功課也諸後生有與我較勤惰者乎先生雖家居而聲氣廣通海內有丐其數言之贈答而私爲拱璧者方樸山先生榮如嘗造省寓相謁譙談竟日不忍別去謂所見遠勝所聞蓋樸山與先生同受知文宗顏學山先生學山先生對諸生云吾試湖東上六郡得三佳士溫州谷君嚴州方君金華王君克稱完璧試藝可傳故先生曾謂泰山二句文至今膾炙人口戊辰會試魁卷多有用先生文者以文至極則彙天下名才莫能易也先生少年登蕭山毛西河先生門西河一見如故遂折輩行爲忘形交講論古今至夜分不輟先生盡得西河著述并所論議而學益廣西河六經全集序諸貴人作皆不用而獨喜先生以弁其首其相契乎有特深矣西河送先生必至舟次囑云勉旃婺州理學復振惟視子矣書札歲往來不絕雖九旬外無稍間文宗汪荇洲甫下車即詢先生名試事竣命介賁鼎綴并李安溪集聘先生時方出貢馳謁相見甚歡劇談罔倦索先生著述呈金華文略深加贊賞其原序係毛西河先生作荇洲亦加序以續其後復呈四書口談并廣性理吟逐細詳閱云此必傳之書可一洗書說之翳霧不但貫徹大全宗旨更能超軼宋儒藩籬吾當代子刊行已發坊繕寫忽以急於旋都不果糧道程公諱光鉅者以饑務至東陽邑尊馬公參謁畢即問及先生馬公答未獲見程公云汝真俗吏枉蒞茲土即欲就廬相訪吏役以路遠崎仄合稟乃止遂令吏刺并家刻數種詣先生家以展欽慕意又立催邑

尊舉先生賢良方正申文至府及司撫矣因先生以老疾苦辭而止後馬公來謁先生方寒疾親至卧榻執先生手申悃悃出曰今獲一晤願始慰矣凡來令東陽者下車後莫不具刺款門敬禮有加而先生雖亦偶至城邑尊卒難邀其一見惟劉公諱榮符者性傲慢士素不通音問而牧事嚴明先生嘉之金華徵獻獨爲立傳謂人曰清官甚難得也後劉公丁內艱離任始知尊重先生洵人卑辭乞詩以榮歸里先生予之結語云況鍾不識龍文度難損循良一代名蓋得好惡之公正未有如先生也邑尊麗諱璽者謁中丞法諱海輒問金華有王某知之乎麗答云名已聞人未覲也中丞云吾早見其詩甚佳倘有著作希盡購之麗公回即命人至先生家刷詩文集各數十本以呈永康程敬一先生以主事歷任至道其尊人需齋先生隨任沒於署敬一扶柩歸葬以年侄誼來乞墓誌先生以敬一所交多鉅公何取山人言固辭敬一云開業所交雖廣其不乞言當路者以心目中大河以北則有李恕谷先生大江以南則有王鶴潭先生先君在日恕谷曾許作傳奈先君彌留之際猶兢兢遺言必欲得先生數語目始瞑其爲所欽尊如此江干張白湖諱錢澧詩學甚精迸棄一切杭人多宗之見先生輒傾倒心服執弟子禮所呈詩有何事數追隨之句四明鄭南谿性號五嶽遊人遍交天下知名士因得友人挽父禹梅先生詩拜泣墜地詢係先生代作千里造廬相訪迨先生沒又親詣吊拜哭諸墓誄詞有東浙哲人萎蒼天不慙遺之句平時贈詩有心如秋水原無底身在懸崖第幾層又云一道康莊原四達知君拋得定盤針秀水諸乎齋錦謂先生文足羽翼先儒行堪楷模後學其詩逼真盛唐風味贊曰淵默雷聲雷聲淵默問之先生笑而不答